09.07.2020 **№ 13** (1223)

www.khanty-yasang.ru

Основана 11 февраля 1989 года

E-mail:gazeta@khanty-yasang.ru



Ты номерт ловиньтэн:

Округ кущай тытнох чынк ён порсум махум кастысанэ

хонтлам хумыт

2

10

Лўсум маньщи няврамыт урыл потыр

4-5

13

Омам хольт **ЮНСХАТЭГУМ** Тав налыман арыгкем тал школат рўпитас

Эргын-ййквнэ маньщи нэ

Сав тал аквъёт **ОЛНЭ НЭГ-ХУМЫГ** янытлыягув

16

6-7

8-9

Округ кущай нэ яныг хонтыт порсум махум кастысанэ



Округ кўщай нэ Наталья Комарова Ханты-Мансийск ўскант най акваг тэнэ ман хорамын луптат пиныс, яныг хонтыт порсум махум кастысанэ. Ты вармальн Ханты-Мансийск ўс кўщай Максим Ряшин, округ полиция кўщай Василий Романица ос мирн нётмил варнэ маньлат хотпат ёхталасыт.

Лупта этпос 22 хоталэ - яныг хонт порат порсум махум номылматыглан хотал. Та пилыщман нак овылтахтам пасныл ань 79 талэ товлыс. Тонт махманув мав нила тал вуянтасаныл, 27 млн. арыгтем элумхолас порсыс. Ты щар тарвитын хонтлын нак олыс.

Войнан Югра маныл пуссын аквъёт 17 сотыра 890 хотпа хонтлункве тотвесыт. Тыгыл 430 элумхолас – ты сосса махум олсыт. Ты войнаныл китхуйплов сотыра арыгтем хотпа юв ат ёхтыс. Тан хотты мат акваг та хультсыт. Ман тананыл акваг номункве патыянув.

Ань порсум махум кастыглым порат Наталья Комарова акв кум астал люлис. Тувыл Победаволонтёр маньлат пыг ёт ахвтас парт тармыл хорамын луптат пинсыг.

Ань ты накт ма янытыл хащтал агм емтыс. Тыимагыс тув атхатыглам хотпат нёланыл ос сўпаныл торыл лап-пантым ощсаныл ос пассал масхатым олсыт, танки халанылт элыннув люльсыт. Тох ўргалахтым хащтал агм мот хотпан ат ханхи.

Николай МЕРОВ

Юван Шесталов нампа премиял оста хантыт майвесыт

Округ кўщай нэ Наталья Комарова лўпта этпост олыглам сапранит маньщи хум Юван Шесталов намыл пиным премиял урыл потыртас.

Тав лавыс: «Сосса махум пёс йис вармалит ос щань латын элаль тотнэ магсыл ты талт организацият халт премия-олныл Хальўс район Тэк павылт олнэ «Ас нэ» нампа коллектив майвес.

Маньщи, ханты ос ёрн махум халт «Окружная школа Медвежьих игрищ» нампа ханищтан колт рупитан хум Тимофей Алексеевич Молдановос Нижневартовский район Ларьяк павылт ханты латныл няврамыт ханищтан нэ Мария Прасина премия-

олн висыг. Ам тананыл сымыныщ янытлыянум ос сав ёмас латын лавегум».

Юван Шесталов нампа премия сав эрнэ тэла варнэ хотпатын ос организациян магсыл 2012 тал пасныл майлаве.

Касын тал ты премиял-олныл кит хотпа касыл щирыл 75 сотыра солковил мивег ос акв коллектив 200 сотыра солковил таставе. Ты тал касылн 12 коллективыт ос 13 элумхолас танки нэпаканыл кетыгласаныл.

«Āс нэ» коллектив 1980 тал пасныл рўпиты. 40 тал сыс Тэк павылт олнэ ханты нэт савсыр ялпын хоталыт, фестивалит щань латныл эргыт эргегыт ос ййквыт ййквегыт.

2016 талт тан «Живущие по солнцу» нампа финно-угорский фестивальн вовыглавесыт. Тот ханты нэт савсыр коллективыт халт нохпатсыт ос Гран-при муйлупса висыт.

Тимофей Молданов учёный хотпаг олы. Юи-овылт талытт тав Ханты-Мансийск ўст Творчество колт рўпиты. Тот няврамыт магсыл «Школа Медвежьих игрищ» нампа кол варыс, пыгрищит тўлыглах-

тункве ос ханты эргыт эргүнкве ханищтыянэ.

Мария Прасина школат 31 тал рупиты. Ханты нэ няврамыт ханищтан учебник-нэпакыт хансыс. 2015 талт Марина Александровна «Учитель года» касылт нох-патыс. Наме «Лучшие в образовании» нампа нэпакн ань хасвес. Ос тав ханищтан нявраманэ савсыр касылт, олимпиадат нох-патыглэгыт ос овыл места ватихал вуйлэ-

Округ мирколныл кётым ляххал маньщи латныл Людмила ТЕТКИНА хансыстэ

Москва ўст Парад Победы олыс



Ты тал Россия мав янытыл Победа хоталт ат муйлысув. Ань пилыщман агм ма янытыл тарамламе магыс акван-атхатункве ат рови, янк натнэ этпост пуссын юн олсыт.

Янк натнэ этпост Россия Президент В.В. Путин лавыс, Парад Победы ман тах акв хотты хотал варилув. Махманув нох-патманыл пасныл тысавит тал товлыс — 75 тал, ялпын хоталув хумус нас тох мины. Етыл тара-патыс, лупта этпос 24 хоталэт варункве номылматсаныл.

75 тал ювле хультум порат, война юи-палт

1945 талт, ос акв тыхотал, Москват нох-патум махманув магыс овыл яныг Парад Победы олыс.

Та хотал хольт ты тал армият лусытан пыгыт Выгыр ўсканын знамя Победы тўлсыт. Тувыл ўскан хосыт акв юи-палт 13 сотыра арыг салтат ёмсыт.

Това салтатыт элы хон маныл ёхталасыт, ман аги-пыганув халт

ёмсыт – Казахстаныл, Узбекистаныл, Туркменистаныл, Азербайджаныл, Китайныл, Монголияныл, Сербияныл ос мот маныл олсыт.

Россия Президент Владимир Владимирович Путин тох лавыс: «Нох-патум махманув овыл Параданыл тыт ты олыс, та пасныл 75 тал ювле хультыс. История щирыл нанки, тонт Советский союз махум танти мананыл магыс такыщ люльсыт, фашистрищит пуссын витыг-тотсаныл.

Тан люль номтаныл тэлаг ат ёмтсыт, танти та порслувёсыт. Та Парад Победы порат тан флаганыл ос знамёнаныл салтатанувн акв тармыл нас пахвтувёсыт — ань вос ваганыл, ман ятил матёв нэмхотьютн ат мыглув, хота мус вёрмёв, воритотункве патэв.

Ань ты ўскан хосыт хум хотпат, пыгыт ос агит щар акв хольт татем ёмсыт. Яныг хонтыт патум махманув ос аквтох пуссын аквхольт люльсыт, фашистыт ёт пилтал хонтлысыт.

Тан хонтлункве хунь кос тахсыт, мот хон ма ат киссыт, сорни ат нявлаласыт. Туп акв номт ощсыт – та утыт витыгтотункве, ос колтагыл махманыл палт юв-минункве.


Тох и ёмтыс, туп юв пуссын ат ёхтысыт, нох-патум мирув савынпалэ хонтлум мананылт та патсыт. Ман ань тан элыпаланылт пунканув ёлтартыянўв, тан варум тэланыл нэмхуньт ат ёрувлыянўв».

Салтатыт ёмум юипалт Выгыр ўскан хосыт военный техника машинат минасыт. Тувыл нумынт ос истребитель нампа товлынхапыт яласасыт.

Ань ты тал Россияв янытыл туп 28 ўсытт Парад Победы варыглавес — Москва коны-пал Санкт-Петербург, Волгоград, Севастополь, Керчь, Новороссийск, Тула, Улан-Удэ, Хабаровск, Новосибирск ос мот ўсытт.

Светлана РОМБАНДЕЕВА







Хорынпавылныл хонтлам хумыт

Хальўс районныл хонтлам ман тотыглым махум урыл ман элаль хансэв. Сав хум хотпат Хорынпавылныл войнан тотыглавесыт. Товат юв ёхтысыт, товат ванэтал хотты мат акваг та хультсыт. Ман тананыл олнэв палытыл акваг номункве патыянўв. Махумаквет, нан ань элаль ты хумыт урыл ловиньтэн.

Илья Петрович Волков

Илья Петрович 1911 талт Хальўс район Хорынпавылт самын патыс. Оматэ Дарья Волкова, экватэ ос Анастасия Садомина олыс.

Хум 1942 талт мань таквс этпост Ханты-Мансийск ўс военкоматыл хонтлын ман тотвес. Та пасныл юв пищма ат хансыглас. 1943 талт тав хотты мат ванэтал та хультыс. Воссыг мот потыр тав уретыл атим.

Иван Васильевич Вьюткин

Иван Васильевич 1912 талт Хальўс район Хорынпавылт самын патыс. Хум 1942 талт ойттур этпос китхуйпловит хоталт хонтлын ман тотвес.

1944 талт ват саграпнал этпост тав хотты мат ванэтал та хультыс. Тамара Савельевна Ванюта тав урет Хальўс архивт тамле потыр хонтыс.

Тот тыщир хансым олыс: «Иван Васильевич 1930 талт маньполь этпост ват нупыл нилыт хоталт Матрёна Тимофеевна Кугина нэг тотыстэ. Ты щемьят нила няврам: Мария, Пана,

Кузьма ос Савелий яныгмасыт. 1953 талт Матрёна Тимофеевна колтаглэ ёт Сукыръя павылт олыс».

Иван Михайлович Паланзеев

Иван Михайлович 1919 талт Хальўс район Хорынпавылт самын патыс. Оматэ наме Мария Паланзеева олыс.

Хум 1942 талт мань таквс этпост Ханты-Мансийск ўс военкоматыл хонтлын ман тотвес. Та пасныл юв пищма ат кетыглас. Тав 1942 талт ват саграпнал этпост хотты мат ванэтал хультыс. Воссыг мот потыр тав урет атим.

Дмитрий Тихонович Хозумов

Дмитрий Тихонович 1921 талт Хальўс район Хорынпавылт самын патыс. Тав ййгрище наме Анна Хозумова олыс.

Хум 1941 талт ойттур этпост Хальўс военкоматыл хонтлын ман тотвес. Дмитрий Тихонович 1941 талт яныг таквс этпост хотты мат ванэтал та хультыс. Воссыг мот потыр тав урёт атим.

Абрам Михайлович Хозумов

Абрам Михайлович Хальус район Хорыңпавылт самын патыс.

Хум хонтлын мат порслувес. Ман мавныл хонтлункве минам ос порсум махум наманыл Тюменский областы таратым нэпакт хансым олэгыт. Тав наме тот ос олы. Воссыг мот потыр тав урёт атим.

Алексей Дмитриевич Хозумов

Алексей Дмитриевич 1919 талт Хальўс район Хорынпавылт самын патыс. Тав омаге-атяге Дмитрий Алексеевич ос Домна Ефимовна Хозумовыг олсыг. Щёмьянылт Алексей коныпал ин кит няврамыг, Илья ос

Александра, олсыг.

Хум 1941 талт Хальус военкоматыл хонтлын ман тотвес. Тав савсыр мат хонтлыс. Пилталыг хонтламе магыс «За боевые заслуги» магылн тагатан посыл майвес. Алексей Дмитриевич 1946 талт юв ёхтыс.

Война юи-палт колхозт хул алыщлан ос вораян хотпаг рупитас, тав пиркатирыг олыс. Ёмщакв рупитаме магыс хум «Ветеран труда» нампа магылн тагатан посыл майвес.

Алексей Дмитриевич экватэ Евдокия Викторовна Анямова, Хорынпавыл павыл нэ, олыс. Ты щемьянылт кит няврам Николай ос Агафья яныгмасыг. Агафья Алексеевна Вьюткина потре щирыл, Алексей Дмитриевич **олмет** война урыл щар ат потырталыс. Хум 1986 талт лупта этпост хурумхуйплов хоталт атимыг емтыс. Тав Хорынпавылт ёлщёпитавес.

Георгий Андреевич Хозумов

Георгий Андреевич 1920 талт Хальўс район Хорынпавылт самын патыс. Экватэ наме Ульяна Михайловна Хозумова олыс.

Павлын махум потраныл щирыл, ты щемьят акв аги Валентина яныгмас. Хум 1942 талт мань таквс этпост китыт хоталт хонтлын ман тотвес. 1943 талт маньполь этпост тав хотты мат ванэтал та хультыс. Воссыг мот потыр Георгий Андреевич урыл атим.



Хорынпавыл

Ефим Данилович Хозумов

Ефим Данилович 1923 талт Хальўс район Хорынпавылт самын патыс. Тав омаге-атяге Данила Иванович ос Мария Петровна Хозумовыг олсыг.

Тэн нила няврам: Ефим, Елена, Анна ос Анастасия ощсыг. 1937 талт атяныл Данила Иванович кулакыг лаввес, ўйхуланэ, матаранэ пуссын хот-вуйвесыт, хум порславес.

Ефим Данилович 1942 талт янк натнэ этпост хонтлын ман тотвес. Тав Ленинградский фронтыт хонтлыс.

Пищманэ кйвырт олныт юв кётыглас, оматэн ос ййгрищанэн нётыс. Хум 1944 талт рётын юсвой этпос китыт хоталт порс-

лавес. Тав Эстония мат Нарвский районт ёлщёпитавес.

Ань Кульпас павыл музейт Ефим Данилович хонтлам маныл юв кетыглам пищманэ ин оньщавет. Това пищмат маньщи латныл хансым олэгыт.

Ты пищмат Кимкъясуй павылт олнэ апге Клавдия Ивановна Вынгилева тав музейн мисанэ.

Иван Кузьмич Хозумов

Иван Кузьмич Хальўс район Хорынпавылт самын патыс. Ос хонтлын ман тотвес, тот хотты мат порславес. Ты урыл потыр Тюменский область хонтлум махум урыл нэпакт хансым олы. Воссыг мот потыр тав урёт атим.



А.Д. ос Е.Д. Хозумовыг

Илья Петрович Хозумов

Илья Петрович Хальўс район Хорынпавылт самын патыс. Хум хонтлын ман тотвес, тот хотты мат порславес. Ты урыл потыр Тюменский областьныл хонтлункве минам махум урыл нэпакт хансым олы. Воссыг мот потыр тав урет атим.

Пётр Степанович Хозумов

Пётр Степанович Хальўс район Хорынпавылт самын патыс. Тав экватэ Анисья Дмитриевна Сайнахова олыс.

Экваг-ойкаг кит аги, Александра ос Матрёна, ощсыг. Пётр Степанович Хальўс военкоматыл хонтлын ман тотвес. Тот хотты мат хонтлыматэ порславес.

Тав атимыг емтме юи-палт экватэ агин тагыл Сукыръя павылн, такви яныгмам колэн, вантлыс. Воссыг мот потыр Пётр Степанович Хозумов урыл атим.

Семён Дмитриевич Хозумов

Семён Дмитриевич 1919 талт Хальўс район Хорынпавылт самын патыс. Атятэ наме Дмитрий Хозумов олыс.

Хум Ханты-Мансийск ўс военкоматыл хонтлын ман тотвес. Тав 165 стрелковый дивизият хонтлыс. 1942 талт ретын юсвой этпос атхуйпловит хоталт Семён Дмитриевич порславес.

Маньщи хум Ленинградский областьт ёлщёпитавес. Воссыг мот потыр тав урёт атим.

Сергей Васильевич Хозумов

Сергей Васильевич 1924 талт Хальўс район Хорынпавылт самын патыс. Атятэ наме Василий Гаврилович Хозумов олыс.

Хум 1942 талт ойттур этпост Хальўс военкоматыл хонтлын ман тотвес. 1943 талт маньполь этпост хонтлыматэ хотты мат ванэтал та хультыс.

Тав атятэ Василий Гаврилович 1895 талт самын патыс. Хум хул алыщлан хотпат палт пиркатирыг рупитас.

Тав 1946 талт яныг таквс этпос атыт хоталт «За доблестный труд в Великой Отечественной войне 1941-1945 гг.» магылн тагатан посыл майвес.

Янытлан нэпакет тох хансым олыс: «Василий Гаврилович Хозумов Хорынпавыл колхозт 1939 тал пасныл рупиты. Овлэт вораян хотпаг олыс. Юи-овыл хурум тал хул алыщлы. Тав сав хул пуви. Хулпанэ, толганэ акваг хотщёпитым оньшиянэ».

Фёдор Георгиевич Хозумов

Фёдор Георгиевич 1913 талт Хальус район Хорынпавылт самын патыс. Атятэ Георгий Хозумов олыс.

Хум 1943 талт лупта этпост Хальус военкоматыл хонтлын ман тотвес. 1943 талт ват саграпнал этпост тав хотты мат ванэтал та хультыс. Воссыг мот потыр тав урет атим.

Ты потыр «Птицы светлой памяти» нампа нэпак хосыт газетан Н. НИКИТИН хассанэ

Лўсум маньщи няврамыт урыл потыр

Свердловский область Ивдельский район Полуночный павылт маньщи няврамыт ханищтахтэит.

∙от сака хосат тайл . интернат ўнлы, тув савсыр павлытныл маньщи няврамыт ос рущ няврамыт акванатвесыт. Ань туп маньщи няврамыт тот хаништахтэит.

м ос тот нёлолов **/1**тāл ханищтахтасум, ты элы-палт ам щанюм тот ханищтахтас, сасгум. Керасколыңъя павлың маньщит пуссын тот ханищтахтасыт. Тонт интернатта сака сав няврам олыс, маньщи няврам коныпал ос рущ няврамыт олсыт.

Та порат тот хурумсат манос ниласат няврам ханищтахтас, ётыл пуссын няврамыт лакква-тотвёсыт. Маньщи няврамыт Серов ўсн, рущ няврамыт ос ма янытыл хоталь-ати тотыйлавесыт, интернат лап-пантыйлавес.

Хунь ам ханищтахтын маныл Серов уст пойтсум, Полуночный павылт интернат маньщи няврамыт майс ос палый-пусвес, сартын кусвес щар лап-пантункв, тувл маньщи няврамыт арыйтаптанкв Серов ўст. Маньщитна люль олнув няврамыт майс таяныт вайл эл яласанкв.

Етыл ман нявраманув акв тув тотвесыт, ань тот ханищтахтэит. Тан тот арыйтасыт танккеныл, тов няврамыт ханищтахтан мананыл холтасаныл. Маньнув няврамыт тот арыйтасыт элаль ханищтах-

Акв пыйрищ тот ханищтахты, тав Пакин



Маньщи няврамыт матыр послым ўнлэит

павылныл олы, наме Пакин Никита Алексеевич, тав интернатта канке ам ётум ханищтахтас, наме Мохин Илья. Мен тав ётэ акв класста ханищтахтасмён, тэн щанен наме Пакина Тамара, Никита ос аще наме Пакин Алексей, тан павланыл наме Тальтия.

Илья ань армиян вуйвес, тан ос ань танккеныл юн олэгыт, Никита аще ворт вораим ёмыйты, щане ос юн ўнлы, пыге няврам оньщим. Ильятэ маньщи нэ ёт олы, наме Пакина Варвара, няврам оньщей.

Гувыл ос Анямова L Надежда, тав ос Ушма павылт олнэ айрищ, тав ам сасгум айи, сасгум наме Анямов Николай. Пес ос Керасколынъя павылт олыс, ань сасгум хурум няврам оньщи, щар мань пыйрище наме Костя, яныйнув пыйрище наме Толя.

Ам апщирищум Сашам ос тот олы, мен апщирищментыл акв мат порат Пакин павылт олсумен, ётыл щанюмен порсас, сасгумен менамен такинатэн висайе.

Тав мён майсылумён

ань сома ащ, тав нэтэ ос сома щань. Тав наме Бахтиярова Наталья Савельевна.

Ман пес, хунь сасгум яныйнув пыге самна патыс, ос Керасколынъя павылт олсув, ётыл ущ Ушма павылн вантласув, сартын люль олыс, ань ос та павылт олункв ханьщувласув.

Акв пыйрищ ос Лэпла павылныл олы, наме Анямов Максим. Тав ос щане наме Анямова Татьяна Владимировна, хум варыс, тувыл Лэпла павылн олункв минас, сартын Керасколыңъя павылт олыс, ётыл Ушма павылн олункв вантлас, Ушма павылныл ос Лэпла павылн.

Максим яйаги оньщи, наме Таня Анямова, яглананыл наме Тасманов Владимир, сака хосат тайл тан тот аквъёт олэит. Та коныпал ос нилах ман хурмах няврам арыйтас, тувыл та.

Хоты няврамыт ханищтахтан пораныл холас, элаль ханищтахтанкв минасыт, элаль туп айит ханищтахтэит,



Дарья Жорник пыйрищакве ёт потырты

09.07.2020



акв айи наме Тасманова Анна Андреевна, Краснотурьинск ўст леккарыг ханищтахты, тыил ты пойты.

ыит ос ат танхеит **L**ханищтахтанкв, минасыт юв, юн олункв, вораянкв, щанянылнащанылна нётункв. Сорп лэс ўнттэгыт, хунь сорп патаве, хот-пайтъяныл, арыйтам нёвлит тыналыяныл.Танки майсаныл хот-тослыяныл, ос нёхыс керняль ўнттэит, нёхыс сове ань тының, нёхыс сов рущит сака вовеит. Тов порат вас патлуптэит, кисупа, щёпыр. Туяй ос щёпыр, ятри тимна ялантэит, янкылманна сорп лащункв.

Та коныпал ос осэва-

тал маньщи эрнэ пормасыт ханищтахтэит варункв, маньщи суныт, колыт, ёсат, тамле рупата сака такищ тарвитан, элумхолас таккет кол ўнттункв ат вёрми, таи майс павлын маньщит акван-нётхатым танки халанылт олэит.

уи ос нёрн ялантэит, тот салыт патлуптэит, нёвле акв тот хот-тослыяныл, няр нёвыль юв тотункв сака тарвитан. Тов няврамыт ос нэмхотьютна ат ханищтавет, тан танки ханьщувлэит мот элумхолас ляльт сунсым. Айит ос щанянылна пурка юнтункв ханищтавет, няра, маньщи суп.

Та коныпал пил ватэит, лахыс атэит, юн



хот-пайтыяныл тэлы тэнэ майс. Ман тащир касын тал варев. Тов порат рущит ёхтэит, пайтым лахсыт, пилыт ёвтъяныл.

Ганьщит кос хунь '∎нявраманыл ёт аквъёт матыр варсыт, маньщи няврамыт кос хунь каркамыт олсыт, щанянытна, ащанытна нётсыт. Ань ос туи няврамыт пуссын рутананыл ёт юн олэит, осэватал савсыр вармаль щаквщейт.

Ань тах ойттур этпоста махмыт пуссын нёрна минэит, нёр я ватат яныйман тэрпин тар хилункв, тувыл саюмпум атункв. Нёрн тан лайлыл ёмеит, кит хотал хулым лёнх

хосыт, хунтаныл сака тарвитаныт.

Нёрн ёхтынэй мус щар вайтал патэит. Тов порат тувле нупыл миннэ машинан талэит, мощ тотавет, элаль ос лайлыл ёмирищит. Нёр ватат ос маньщит олэит, пес ащаныл ўнттум колытта, нёр алат ос ёрн-

кол тущтэит.

Тёрыл касың хотал **⊥**хўнт ёт сака тарвитан ёл-тартахтункв, тувыл нох-ханхункв. Та майс тан тарвитан хунтаныл арыйтаптыяныл ащаныл колт, ёт тэнут мощ ломт выит. Хунь тэнутаныл нёрт холы, акв хотьют ёлкетаве, тэнут майс.

Алпыл ос квалэит хотал палытна нёр хосыт я ватат яныйман тэрпин тар кинсункв та минэит, ёмнэ мус ос саюмпум маныйтэит. Етыл хунь юв ёхтэит, тэрпин тарыт рущитна тыналыяныл.

Тов рущит ёвтэит, тов рущитна ат эри, товат ос щар ат ваяныл маныр тай. Хунь тыналыяныл, та олныт мус ос маныр танхеит, тай та ёвтэйт, хунь интернатна минэит.

Маньщи няврамыт тащир та хотум каркамлахтым олэит. Нэмат хотьют нэмат хуньт ат савлахты, рупитанкв пуссын хасэгыт.

Евгений АНЯМОВ Д. Жорник мим хурит



Интернатт олнэ маньщи няврамаквет

Омам хольт юнсхатэгум

Хальўс район Кульпас павылт Мониныт колтагыл олы. Кульпасн тан хосат Хохан павылныл вантлысыт. Маньщи нэ Зоя Петровна Тоголмазова ты рўтныл олы. Тав ётэ хонтхатыгласум, олупсатэ урыл китыгласлум. Нан ань элаль Зоя Петровна потре ловиньтэлын.

– Ам Хохан павлыт самын патсум, янк натнэ этпос 7 хоталэт 1952 талт. Ты павыл рущ щирыл Куги павлыг лававе, Сортынъяг-Кульпасыг халт ўнлы.

Атям Петр Николаевич Монин ват саграпнал этпост 1930 талт самын патыс. Тав Пёткас павылныл олыс, Мониныт пуссын тувыл олэгыт. Атям яныг колтагылт яныгмас. Тан Сортынъян олмыгталсыт, тувыл щащёквам Ягримн вантлыс агитэ палт, нявраманэ ос пуссын тув минасыт.

Āтям рўтныл яныгхотпат ань нэмхотьют атим, пуссын холасыт.

Тав колхозт рупитас, тувыл агмыныг емтыс, астма агмыл хартыс. Пенсиян аты ялыс, атимыг емтыс.

Омам Анна Никитична, такви опарищ наме Смиркина, 1927 талт самын патыс. Ащойкам Луски ойкаг лаввес. Анеквам хосат холас, тонт омам ин

мань олыс, маньтагыл оматал хультыс. Увщи ос кит каңк оньщас. Увщитэ тыт Кульпаст олыс, Николай Ильич Сайнахов экватэ – Александра Никитична. Зоя Финкель ос Таня Батманова ты ам аңквагиягум.

Омам сав тал тыт зверофермат рупитас. Хунь пенсиян минас, интернатн эти рупитан хотпаг патхатас, тот хоса рупитас. 2017 талт атимыг емтыс.

Омагум - атягум Хохант акван-хонтхатасыг. Тэн сат няврам янмалтасыг. Щар яныг увщим Нина, Тэк павылт олы. Тувыл Оля, тав ань атим. Вера эщум Югорск ўст олы. Апщиянум Серёжа, Валера ос Коля пуссын тыт Кульпаст олэгыт. Коля щар мань, тав Тюменьт ханищтахтас. Экватэ Тэк павыл нэ, хурум няврам оньщег, ань пуссын яныгмасыт.

-Зоя Петровна, школат нан хот хаништахтасын?



Мониныт колтагыл



3.П. Тоголмазова

- Ам садикн ат ялантасум, школат Сортынъя павылт ханищтахтасум. Рокина Евдокия Гавриловнан ханищтавесўв. Ман, няврамыт, хунь школан ущ минасўв, сумкат ат ощсўв, тав манавн тор сумкат юнтыс.

Сатыт классын минамум порат, павылт колхоз лап-пантвес, махум янгыщ тыгле вантлысыт. Нина увщим тонт нёлолов класс астлыс, ман Кульпасн олмыгтасув, тав ос Ханты-Мансийск ўсн ханищтахтункве минас.

Школа астламум юипалт Ханты-Мансийск ўст олнэ медучилищан поступайтанкве ялсум кос, ос таквсы ханищтахтункве ат минасум. Келпыл сака пилсум, пўльницат хумус рўпитанкве патэгум, пищпищил пыл ос пилэгум.

Етыл Тюменьт хурум этпос почтат рупитан хотпаг ханищтахтасум. Тонт тамле курсыт олсыт. Почтальоныг хурум тал рупитасум. Хальус район янытыл яласасум, связь отделение кущай ванын нэг патталавесум. Рупатам щирыл район янытэт яласаслум, касын павылт олсум. Тувыл 1977 талт интернатын патхата-



Апыгрищанэ ёт послым олы



Анна Никитична котильт ўнлы

сум, налыман арыг тал тот рупитасум.

Сар ойкам Саша Тоголмазов Ванзеватныл олыс, Женя пыгум тав аще. Мен хунь акван-минасамен, ам Лопмусн кетыглавесум, тот рупитасмен. Ойкам акваг агмыл хартыс, атимыг емтыс. Китыт ойкам Кульпас хум, Лёня Остеров. Тав тамле нёмса хотпа олыс. Кит аги ощсумен, Аня ос Катя. Аням тыт рўпиты школат, Катям Хальўст «Мотив» колт операторыг рупиты. Женя пыгум вораи, хул алыщлы. Хохан павылн яланты, мананув уральталыянэ.

 – Олнэ колын похат сумъях унлы, хотьютн унттувес? - Сумъях Коля апщим тав унттыс. Ань маньщи кур вовегум, нянь варнэ кур. Ман пес колувт тамле кур ощсув, омав акваг нянь варыглас. Хул, ёхул тот тослыс. Ань тот Щерти апщим олы. Колув похат йильпи кол унттыс, пес колув тара хот-вистэ.

Ам ос йильпи кол ўнттысум 2004 талт, государство палыл нётвесўв. Та порат сака мат сав олныл ат майлувесўв. Ман хўрум хотпа китсат арыг солковил туп кетыглавесўв. Кол ўнттункве Коля апщимн ос Женя пыгумн нётвесум. Ат тал ўнттыслув. Лёня ойкам мощ нётыс, агмыныг ёмтыс, колн щалтункве ат та алымас. Апщим ос пыгум колув



Зоя Петровна, апщияге Коля ос Валера



Пум консы

астластэн. Мен Аняментыл нётсумен, тох та ўнттыслув.

Нан тамле нётнэ супыл олэгын, маньщи супын нанти юнтыслын?

- Амти юнтыслум. Паквпалын суп юнтэгум, тучан, юнтуп туштын путскат та маныр. Сакныл турлопс ос мот хорамыт хартэгум, сасныл хусапсовыт юнтэгум. Ань самагум сака ат постэг, щаквщункве тарвитын.

Омам сасныл хусапсовыт юнтыс, сахи **юнтыс**. **Атимыг емтме** элы-палт нуйсахи юнтыс. Ам хунь пес щирыл **ю**нсхатан ханищтапын Хальўсн ялсум, омам нуйсахитэ ёт тотыгласлум, тот суссылтаслум. Ханты ос маньщи мир пёс пормасаныл ханищтан махум лавсыт, эрнэ щирыл юнтме, пес махманув тох ты щаквщисыт. Омам лавсас, сахи музейн маёлн тах, нан хунь оньщилын.

Атяв мойт вас, потырталыс. Омав маньщи эргыт эргыс. Ман аты хунтлысув, оссам утыт. Ягримт ам ляххал тотнэ хотпатн китыглавесум, хумус яныгмасув, маныр маштырлэв — ам ювле лавсум: «Ты пес тэлат хосат эрыс нох-вормалтанкве. Школат хаништахтамув порат намталавесув, люкамтавесув.

Сортынъят экспедиция олыс, элы маныл сав мир ёхталас, акв хурип хотпа хунь олыс. Ман, няврамыт, ювле маныр лавев, эссамтасув».

Ойкам олмет юн маньщи латныл потыртасмен, нявраманмен латнаныл мощ торгамтыяныл. Маньщи газета ёхталы, ловиньтылум.

Зоя Петровна – каркам нэ, сымың элумхолас. Тав сав тал Кульпас павыл интернатт рупитас, маньщи няврамыт магыс ома хольт олыс. Няврамытн ома-атятал интернатт олункве тарвитын, хотьютн сака хунь уральтавет, хунтлавет. Матыр тарвит номт ощсыт те, тав палтэ хайтсыт, потыртасыт, китыглахтасыт. Зоя Петровна касын агирищн, пыгрищн нётыс, тармыл патсанэ. Такви нявраманэ хольт тованакт такыщ лавиянэ, тувыл эруптыянэ, сыныгтапалыянэ.

Зоя Петровна интернатт яныгмам, ханищтахтам хотпатн янытлаве, ань тыхотал мус ёмас латныл номылматалаве. Ты ятил маньщи нэ пус кат, пус лагыл вос олы, Най-Отыранэн вос ургалаве.

Светлана РОМБАНДЕЕВА

Тав налыман арыгкем тал школат рупитас

Хальўс район Хулюмсўнт павыл школат Альбина Ксенофонтовна Таратова овыл кущаиг олыс. Тав 40 арыгкем тал школат няврамыт ханищтас, ты тал лупта этпост рупатаныл пенсиян минас.

Школат савсыр талытт ханищтам махум таве янытланкве ёхталасыт, хорамың лупта тавен муйлуптасыт ос тав ётэ школат похат йивыт **VHTTЫСЫТ.**

Хулюмсунт павылт 1982 талт овыл школа варвес. Аквта талт Альбина Ксенофонтовна рупитанкве тув ёхтыс. Та пора урыл тав тох потыртас:

– Ам учителиг Ханты-Мансийск уст ханищтахтасум. Ты юи-палт Сортынъян, яныгман павлумн, ювле ёхтысум. Ат тал тот рупитасум, тувыл школа лап-пантвес, ам Хулюмсунтын няврамыт ханищтанкве кетвесум.

Павыл ос школа сунсункве ойкам ос Лариса Николаевна Изалеева, няврам ханищтан нэ, ёт минасув. Та хотал ам сака ёмащакв номилум. Ягрим павылныл Хулюмсунт мус вертолётыл тыламласув. Школа рущ павыл котильт ўнлыс, колэ мань олыс, туп кит колнак.

Павыл сунсыглым ёмыгтасув, хулэв, моторхапыт яласэгыт. Махум китыгласанув, Тагт я хот овты. Тан лавсыт, рущ павылныл я ат нанки, маньщи павылн минункве эри.

Ман маньщи павыл нупыл та ёмантасув, тувыл тай та лёмвуин олыс, ювле нас хайтсув, маньщи мир ёт аты вайхатсув, я аты касаласлув. Китыт хотал Ягримн минункве кусыгласув, тувыл вертолётыт исыглан мат хурум хотал лёмвуит тыттым ўнлысув, нилыт хоталт туп тыламласув.

Ханищтан тал овылтахтын элы-палт Хулюмсунт павылн ёхтысув. Олнэ колыл тара майвесув, мот махум хольт вагончикыт олсув.

Ам Хулюмсунт школа кущаиг рупитанкве паттувесум. Та талт 33 няврамыт ханищтахтункве ёхтысыт.

Овыл классын 22 агирищит ос пыгрищит ялантасыт, тананылн Лариса Николаевна ханищтас. Ам тара китыт ос хурмит классыгт рупитасум, тонт мощща няврам олыс. Ты юипалт Лариса Юрьевна Хозумова ёхтыс.

Тонт павыл похат газокомпрессорный станция рупитанкве патыс, сав мир тув ёхтысыт. Тыимагсыл кит тал сыс яныг школа ўнттувес, аквторыг тот 195 няврамыт ханищтахтункве та овылтахтасыт. Ты элы-палт маньщи агит ос пыгыт Няхщамволь павылн кетыглавесыт.

2002 тал пасныл Альбина Ксенофонтова пенсиян патхатас, тувыл школат элаль рупитас, няврамыт магсыл продленка варыглас ос



А.К. Таратова вортыпал нупыл люли

тананылн савсыр заданият варункве нётыс.

Альбина Ксенофонтовна Сортынъя павылт самын патыс. Оматэ Нина Матвеевна Лелятова Кульпасныл олыс. Атятэ Ксенофонт Михайлович Захаров Ханты-Мансийский район Кышик павылныл олыс. Такви щёмьятэ урыл тав таи потыртас:

–Ман щемьявт хурум аги - увщим Надежда, ам ос эщум Валентина яныгмасув. Омав агмыл хартыс, ватихал пульницат хуяс, ман анеквав Домна Анисимовна Лелятова палт акваг олсув. Туи порат ман омав рутанэ палт Сукыръя ос Шома павылн ўщлахтункве кётыглавесўв. Маньщи махум халт яныгмасум, щань латын торгамтэгум. Сатыт классыт ханищтахтамум порат омав атимыг емтыс. Атям рутанэ Кышик павылт олсыт, тан ётаныл ман аты вайхатыгласув.

Ойкам ёт Сортынъя

павылт акван-минасмён. Нявраманув Нина, Наталья ос Александр ин школат ханищтахтасыт, хунь ойкам атимыг **емтыс.** Яныг агим Нина ос атимыг емтыс, тонт тав агитэ ин мань олыс. Тав агитэ ос амки янмалтаслум. Наталья агим колтаглэ ёт Надым ўсн вантлас, ойкатэнтыл кит няврам оньщег. Александр Хулюмсунт павылт рупиты, нэ ин ат тотыс. Увщим Надежда щемьятэ ёт Белоруссия мат, эщум Валентина колтаглэ ёт Тюмень уст сав тал олэгыт.

Альбина Ксенофонтовна сав тал ёмашакв рупитаме магсыл савсыр янытлан нэпакыл майвес. Тав Министерство образованиял ос округ Дума палныл янытлан нэпакыт оньщи. Тав лавыс: «Ам тонт сымумт ёмас, хунь ханищтам нявраманум ам ётум пащалахтэгыт, анум номияныл, ат ёрувлыяныл».

Людмила ТЕТКИНА

Белоярский районт «Югра лылыёп» кол 30 талэ товлыс

Белоярский районт «Югра лылыёп» нампа кол рўпитанэтэ пасыл 30 талэ товлыс. Ты кол 1990 талт лўпта этпост рўпататэ овылтаме.

Ань тот пунктотнэ нэ Ирина Фирсова тамле ляххал манавн кетыс. Пуссын хотьют тот пунктотсыт, Ирина Кузьминична таланыл щирыл варыглам яныг тэлат пищматэт хултсанэ. Ман ань ос това тот кущайлахтам хотпат урыл нанан хансэв.

Овыл сапранин мань павылныл 13 делегатыт ёхталасыт ос тан Степан Молданов кущаиг периясыт. Тонт ты организацияныл сосса махумн савсыр праватэланыл палт акваннётхатункве потыртахтасыт. Маньлат хотпат матыр-ати пес накытн ханищтанкве лавхатсыт.

Китыт кущаиг тув Римма Слепенкова тонт периявес. «Югра лылыеп» организация Римма Константиновна ёт ма-вит ургалан вармалит ос мань павлытыт махум пусмалтан тэлат уральтым ощсаныл. Матумпала хотпат ос войнан ялум

хум хотпат ёт вайхатасыт, тувыл пес махум олнэ накыт урыл потраныл нэпакн хансыгласаныл. Семён Иванович Юхлымов, сав пес накыт вам ханты ойка, потранэ ань хунтлункве ман ловиньтанкве вермёгыт.

Римма Слепенкова юи-палт «Югра лылыёп» организацият Владимир Чемляков матах тал пунктотыс. Тав ты рўпитан кол эрнэ нэпакыт пуссын саккон щирыл мўсхалыг щёпитасанэ, тувыл сосса махум тэланыл тарвитыг миннэныл порат тав палтэ ос ёхталасыт.

Тонт Ирина Алексеевна Молданова «Ўринэква хотал», хул алыщлан махум янытлан хотал ос салын махум ялпын хоталыт акваг кассыт, суссылтапыт щёпиталсыт. Ялпус павылт Витхон пурлахтын нак ос Ўй ййкв варыгласыт.

1999 талныл 2005 тал мус «Югра лылыёп» нампа колт Фаина **Иштимирова** кущаиг олыс. Ты элы-палт тав Белоярский ўст эргын-ййквнэ сосса махум акван-атсанэ ос «Увас хурамат» нампа коллектив варыс. Тув щёмьян тагыл нэт ос āгит ялантасыт ос сāвсыр касылыт каснэ порат тан нох-патыгласыт. 2009 талт Фаина Павловна «Заслуженный деятель культуры ХМАО - Югры» янытлан намыл майвес.

Аквта талытт мот хон маныл ёхталам учёныйт Янош Гуя, Ева Шмидт ос Л.А. Верте ханты латын ханищтан магыс Белоярский район хосыт яласасыт ос сосса махум ёт хонтхатыгласыт. Тан «Югра лылыёп» ёт акван-нётхатым сав рупитасыт.

2005 талныл «Югра лылыеп» пунтотнэ хотпаг Надежда Костылева рўпитас, тав юи-палэт 2012 талт Антонина Ледкова тув периявес. Ты нэ Белоярский районт олнэ мирыт пуссын юртыныщ олнэныл магыс савсыр касылыт, ханищтапыт щёпиталыс.

Ос аквъёт рупитам хотпанэ ёт Нумто, Юильск, Полноват, Ванзеват, Самутнёл мань павлытын кас варункве ялсыт. Район янытыл сыресыр тарвит тэлат похан лаквтункве ке эрыс, тан мот кущаит ёт ёмщакв потыртахтым рупитасыт.

Τы тāлт «Югра лылыеп» Белоярский районт олнэ организациян пунктотнэ нэг Ирина Фирсова периявес, тавен нётункве Елена Федотова паттувес. Тэн сака каркам нэг, районт олнэ савсыр организацият ёт тан вайхатым ос юртыныщ аквъёт рупитэгыт ос сыресыр ялпын хоталыг акван-нётхатым янытлыяныл.

Савсыр проектыт хансэгыт ос клубыт, школат, музеит ёт пумыщ тэланыл аквъёт варияныл. Тувыл това вармаляныл ищхипын утн ёл-хансыяныл ос тананыл тот ловиньтанкве рови.

Ань «Югра лылыёп» организация колн щёмьян тагыл махум акван-атхатыглэгыт ос тот варум тэланыл «Хатлые» нампа центрыг намтсаныл. Сав мирыт ёт акван-юрщхатым «В единстве сила» нампа проектыт хосыт щёмьян тагыл матыр щёпитэгыт. Ос Победа хотал 75 талэ товлум кастыл савсыр мероприятият варыглэгыт.



Ханты нэквет янытлавёсыт

Ирина Фирсова кётум потре маньщи латныг Тамара МЕРОВА хансыстэ

Округувт олнэ мир нэпак таратасыт

Ойттур этпос овыл щислат Россия янытыл перияп хотал олыс. Махум РФ Конституция йильпи латныл хаснэ магыс нэпак таратанкве вовыглавесыт. Тот тан китыглавесыт, Конституцият това тэлат пентункве рови манос ати.

Ман олнэ мавт 1 млн 146 сотыра 357 элумхолас нэпак тартункве вёрмёгыт. Ань 18 таланыл товлум агит-пыгыт овыл щёс нэпак тартункве вовыглавёсыт.

Тувыл люль коронавирус-агм ин олнэтэ кастыл махум аквторыг акван ул вос атхатасыт, пёрияп сат хотал сыс минас. Избиркомт рупитан хотпат лупта этпос ват нупыл ат щисланыл рупитанкье овылтахтасыт.

Тан избирательный участкатт ўнлысыт манос ўщлахтын хоталыт сыс сав мирын колыт похат парщин колыт тущтыгласыт ос махум тан палтаныл тув ёхталасыт.

Товат ищхипын ут хосыт «Мобильный избиратель» йильпииг варум тэлат щирыл периясыт.

Ты тал перияп варнэ магыс Роспотребнадзор палыл ос акв комиссия рупитас. Ань люль агмыл ургалахтын магыс нэпак таратан касын хотпа катаге мойтакын тэрпил ловсаге ос тувыл хурыгсовыл майвес. Тав вильт лап-пантнэ торломт масыс, катн мастын тулёвлын пассал масхатас.

Хўрыгсовныл вим хаснэ ййвыл пёриян нэпакн щуртмил послын юи-палт, тувыл ущ нэпак тартункве ровыс. Мир акв ляпат ул вослюляхолсыт, 1,5 мётра палылыт халанылт

люльсыт. Колкант выгыр шуртмилыт послувесыт.

Ань округув янытыл перияп тэлат пуссын тара-паттувесыт. Ойттур этпос китыт щислат избирательный комиссият олнэ кущаит акван-атыглавесыт.

Перияп тэлат тармыл пунктотнэ хум Денис Корнеев лавыс: «Ман ань 714 избирательный участкат нэпак-лопсыт пуссын ловиньтасанув. Ань тара-патыс, периянматт 707 сотыра 553 элум-холас нэпак таратасыт.

Тувыл 487 сотыра 750 хотпа Конституциян хансым латныт йильпииг пентункве касащасыт, ос 212 сотыра 434 хотпа (ты 30% савит хотпа) нэматыр тот пентункве ат танхегыт. Ты халт 6 сотыра 692 нэпак-лопсыт люльсан щуртумтым паттыиг похан-вуйвесыт, тан нэмхотталь ат ловиньтавесыт.

Савсыр муниципалитетыт халт Белоярский районт 89,43 % олнэ махум ос Нефтеюганский районт 92,77 % олнэ махум периян ман ёхталасыт. Ханты-Мансийск ўст ос 91,93% элумхолас периим ловиньтавесыт. Щар мощща Радужный ўст 45,28% ос Сургут ўст 43,49% хотпа туп периясыт».

Комиссият рупитан хотпат пуссын ёмщакв ос макыг рупитасыт.



Эрнэ порат матумпала хотпат палт, юн ўнлантан мань няврамын щемьят палт вовыглавесыт ке, тан волонтёрыт ёт тув ялсыт. Волонтёрыт халт сав маньлат агитпыгыт нётсыт.

Тувыл перияп порат махум магыс «Моя Конституция» нампа викторина варыглавес. Тот ат китыглахтын латын магыс ювле латын кетункве эрыс. Тонт ищхипын ут хосыт номерыл махум майвесыт. Ос нэпак-лопс тартманыл юи-палт ты номере ищхипын утн хасвес ос товат нэпак таратам хотпат матыр муйлупсал майвесыт.

Ты викторина «Открытый регион» нампа центр ос «Югорский Свет» ляххал тотнэ кол варыгласыт. Тув савсыр муйлупсат ёвтвесыт, та халт ат олнэ колыт ос нёлолов автомобилит олсыт. Ос 90 сотыра солкови савит 22 сертификат-нэ-

пакыт щёпитавесыт.

Ань 465 сотыра 789 элумхолас танки латнаныл кетмыт. Тувыл колыт, автомобилит коныпал, мот 378 хотпат бытовой техникал муйлуптавесыт, 1 сотыра 701 элумхолас культура, спорт ос пусмалтахтын колытн ялантан магыс сертификат-нэпакыл майвесыт.

Сургут ўст олнэ махум магыс янас 191 мўйлупсат щёпиталвёсыт. Мот матт ос янас акцият варыглавёсыт, тот ос 1 сотыра 751 хотпат муйлупсал майвёсыт. Хотьют тының мўйлупса ат вис, тав нэпакн ханлым градусникыл майвес.

Округ избирком колныл ос «Открытый регион-Югра» центрыл кётым ляххал маньщи латныл Тамара МЕРОВА хансыстэ

Эргын-ййквнэ маньщи нэ



Карс нэ - ты Мария тав

🖣 вердловский область Тавдинский районт пёс йис порат маньщи мир олыс, тот ань савсыр мирыт халт тан нявраманыл-апыгрищаныл олэгыт. Тантинананыл маньщииг лавияныл, туп латнаныл ат ваганыл.

Мария Александровна Макарова 1986 талт Тавда ўст самын патыс. Атятэ маньщи хум, Городище павылныл олыс. Анекватэ ос маньщи нэ, опарищ наме Безыментова, Тумба павылт самын патыс. Ты маньщи павыл олыс, хосат оссувлавес.

Мария тох потыртас: – Пēс порат мāньщи махманув опарищнам ат ощсыт, таимагыс хунь паспортыл варункве патвёсыт, рущ щирыл Безыментовыг хасвесыт - опарищнам ат ощнэ хотпа.

Яныг анеквам павылт олнэ яныгхотпат ёт маньщи латныл потыртас, юн ос нявраманэ ёт рущ латныл потыртас. Таимагыс анеквам такви латне ат вастэ, рущ щирыл яныгмас. Та порат маньщи мир эрнэ нэпаканылт пуссын рущиг хасвесыт.

сум, омам акваг китыг-

Ам маньщи мирув урыл маньтагыл номсыласлум, рутанув хотыл **ОЛСЫТ, ХОТАЛЬ ВАНТЛЫ**сыт. Школат ханищтахтамум порат, театральный студиян ялантасум эргысум, йиквсум, стихыт хассум. Ётыл стиханум Тавда ўст олнэ поэтыт стиханыл-потраныл халн хасвёсыт, нэпакыг варвесыт.

Школа астламум юи-палт Тюмень ўст культура институтт культурологыг ханищтахтасум. Тот ханищтахтамум сыс, наука тэла торыг эрнэ потрыт хассум. Ляххал тотнэ ман патхатыгласум, 2012 талт Тюменьт «Демография поколений» журналт хурум потранум хансыглавесыт.

– Мария, хурит нан ёрн махум ёт послым **олэгын.** Тан ётаныл эргёгын?

 Тюмень ўст сосса мирыт организация олы, ам тот рупитан махум ёт вайхатэгум. Ты хурит «Хатл эви» («Дочь солнца») ансамбль послым олы. Ханты ос ёрн махум танти эрганыл эргегыт, йиквегыт. Ам това порат тан ётаныл эргим яласэгум.

Институтт ханищтахтамум порат, студия бального танца колн ялантасум. Кущаиг Светлана Пахомова тав олы. Пес порат рущ махум хумус ййквсыт, манхурип маснутыл олсыт, таи ханищтасув. Тувыл ман, янге-мане, та маснут масэв, мирн суссылтан магыс акв юи-палт та ёмыгтэв.

Тув хўрум тал ялантасум. Ётыл ос модельный агентстват рупитасум, тувыл Китай ман кетыглавесум. 2014-2016 талытт тот олсум, рупитасум. Китай мат Россияныл ёхталан эргын-ййквнэ хотпат сака янытлавет. Тув артистанув ватихал ялантэгыт, эргегыт, йиквегыт, ты магыс олныл ойтавет.

Мария ань Екатеринбург ўст олы, лави, элы хон ман воссыг ат мины. Оматэ пенсиян патхатас, тав ляпатэт олункве паты, нётункве эри.

Маньщи мирув халт тамле каркам нэ та олнэтэ. Мария сака потрын, сав махум ёт вайхаты, акваг ханищтахты, хот-ати яласы. Лави, мань леккарыг ос тэнут пайтнэ хотпаг ханищтахтас, массаж варункве хасы.

Ты ятил маньщи нэ пустагыл вос олы, Торум ёт, Отыр ёт вос олы!



Мария ёмаспал нупыл люли

Светлана РОМБАНДЕЕВА

Хурмит нэпак хансункве ты овылтаве

2003 талт округувт овыл «Выгыр нэпак» таратавес, рущ латныл «Красная книга Югры» лававе.



ЛЕСНОЙ СЕВЕРНЫЙ ОЛЕНЬ
Rangifer tarandus fennicus Lonnberg,

Отряд Парнокопытные Artiodactyla

Семейство Оленьи



ОБЫКНОВЕННЫЙ ТАЙМЕНЬ (популяции уральских притоков Нижней Оби) Hucho taimen (Pallas, 1773)

Отряд Лососеобразные Salmoniformes

Семейство Лососевые Salmonidae

Тув мощщаг ёмтум ўйхулыт, ворт яныгман савсыр лўптат, ййвыт ос лахсыт хансавет. Китыт нэпак 2013 талт варвес, хўрмит нэпак 2023 талт тах таратаве.

Ма-вит ўргалан департаментыт рўпитан кущаит, учёный-махмыт, ма-вит ўргалан хотпат йильпи нэпак пуссын аквъёт щёпитанкве ань овылтахтэгыт. Ты рўпата хумус вараве, та урыл ам ты департаментыт рўпитан хум Леонид Александрович Грационов китыгласлум. Тав тох потыртас:

- Мощщаг хультум ўйхулыт, воруйт вос савкар пумыт, луптат ос лахсыт савнувег тыт вос яныгмегыт, тыимагсыл тамле нэпак ман щёпитылув.

Ōвыл нэпакт 227 савсыр ўйхулыт, луптат, лахсыт хансым олсыт. Китыт нэпакн 265 савсыр ўйхулыт, луптат ос лахсыт хасвесыт.

Уйхулыт «Выгыр нэпакн» ке хансавет, тара ўргаланкве овылтавет. Ань округувт вор салы сака мощца хультыс, ман тананыл ты нэпакн хассанув.

Ос ты юи-палт округувт саккон пирмайтавес, элумхолас салы ке

алытэ, тав яныг штраф-олныл пинаве.

Охотинспекцият рўпитан махум ань акваг ворт ты ўит уральтым яласэгыт. Ань ты накт салыт Ямалныл тэпын ма кинсым тыг ёхтункве патсыт, ты вармаль урыл учёныит лавёгыт. Тан ос лавёгыт, Хонтан ос Нижневартовский районыгт вор салы сака мощща, тыимагсыл охотинспекцият рўпитан хотпат ўит ўргалым тот ань акваг яласэгыт.

«Выгыр нэпакн» хансым мот уйхулыт ос аквта щирыл уральтавет.

Мощщаг хультум ўйхулыт, ўит вос сав-мегыт, округ янытыл заповедникыт, заказникыт ос мот ургалан мат ань варев. Молты тал Сургутский районт «Сургутский заказник» ос ты элы-палт Нефтеюганский район «Юганский заказник» нампа ўргалан маг рўпитанкве овылтахтасыг.

Учёный-хотпат тот ань рупитэгыт, уйхулыт, савсыр луптат, лахсыт пуссын ловиньтыяныл. Махумн вораянкве ос хул алыщланкве тот ат рови.

Мотыт тал хурум ургалан ма тах варев, ань эрнэ нэпакыт щёпитэв. Ханты-Мансийский районт «Реполовский бор» нампа заказник, тувыл Нижневартовский ос Сургутский районыгт кит маг ургаланкве тах патавет.

25 тал ювле хультум порат Россия ма-вит ўргалан магсыл сака мощща саккон олыс, ты пора сыс сав йильпи нэпакыт пирмайтавесыт, тамле ўргалан мат ань варёв.

Мощщаг хультум ўй-хулыт «Выгыр нэпакн» нас тох хансункве ман ос ат вермев. Ты элыпалт учёныит, савсыр университетыт ос мавит ўргалан махум ворн акваг ялантэгыт, ты ўй-хулыт хоса ханищтэгыт ос ловиньтэгыт.

Варум рўпатаныл нэпакн хансэгыт, тувыл ман палтув кетэгыт. Ты юи-палт ман савсыр учёный-хотпат акванатыянўв. Мощщаг хультум ўйхулыт, лўптат, лахсыт «Выгыр нэпакн» хансункве ман ати, тан ты сапранит пуссын аквъёт потыртэгыт.

«Выгыр нэпак» хаснэ магсыл ман касын тал олныл тастыглавев. Ты олныл ман экспедиция касын тал щёпиталэв ос учёныит округув янытыл ма-витув ханищтанкве ялантэгыт. Молты тал махум хурум районт рупитасыт, ты тал кит ма ханищтанкве ялсыт. Округув сака яныг, тыимагсыл тан ин сака сав рупата оньщёгыт.

Ма-вит ўргалан департаментыт рўпитан хум ос китыгласлум, хоты хўлыт «Выгыр нэпакн» ань хансым олэгыт. Леонид Александрович лавыс:

- Ты нэпакн супыгхул ос Хальус район ятыт олнэ алнхул хансым олэг. Ты хулыт пувункве щар ат рови. Молты тал таквсы порат Ханты-Мансийск уст Иртыш ян сав мань супыгхулыт витн тартвесыт. Хул янмалтан магсыл олн ма-вой нох-винэ компания тасты.

Махум мохсан хул алыщланкве ань ос ат тартавет, яныг штрафолныл хансавет, ты хул ос мощщаг емты. Мохсан хул «Выгыр нэпакн» хансункве ман ати, учёный-хотпат ань ос номсахтэгыт.

Людмила ТЕТКИНА

Тот пёс ялпын пормасыт суссылтавет

Хальўст музей кол рўпитанкв обвылтахтаме пасныл налыман талыг ёмтыс. Ты кол 1979 тал пусвес. Ань Ўст олнэ яныгпала махум мирн потыртэгыт, ты музей хумус варвес.

Валентина Ивановна Ахтямова ты тал 90 талэ тах товлы, тав 1930 талт самын патыс. Ты эква Хальўс район янытыл намын-суин хотпаг олы, «Почетный житель Березовского района» нам оньщи. Тав сав тал школат уральтым рўпитас. Ты музей хумус варвес, тав тох потыртас:

- Сав тал ювле хультум порат район мирколт рупитан махум ёт ман музей варункв номылматсув. Тонт тыг ёхталан турист-махум сосса мир олупсал сака пумщалахтункв патсыт. Тыг ёхтэгыт, акваг матыр урыл та титыглахтэгыт. Ман тонт торыныщ нэматыр ювле потыртанкв ат вермысув.

Та тāлытт ханты н̄э Хиония Петровна Пухленкина округ миркол Советт депутатыг олыс. Ман тавен ты урыл потыртасув, музей пунсункв вос нёты. Тав манавн яныг нётмил варыс.

Школат няврамыт ханищтан махумн латын тетсув, ты номтув урыл потыртасув. Вовсанув, тан манавн вос нётэгыт. Тох ты лащал-лащал музеюв рупитанкв та овылтахтас.

Налыман тал сыс музей савсыр колт рупитас. Ань ты тирпащ колн тан Николай Кисляченко район кущаиг рупитаме порат вантлысыт. Юиовыл талытт кущаиг Людмила Васильевна Андриянова олы.

Ты музейт рупитан хотпат ань сака ёмащакв рупитэгыт. Няврамыт магыс савсыр пумыщ тэлат варыглэгыт.



Л. В. Андриянова

«Меньшиковские чтения» конференциян тит тал сыс акв щёс учёный хотпат акванатыглыяныл. Тот савсыр пумыщ потыр хунтамланкв рови. Яныг усытныл ёхталан учёныит ос ман округувт олнэ маньщи ос ханты махманув тот ос савсыр докладыт ловиньтэгыт.

Музей кол тиврыт ос пумыщ. Савсыр янас колнакыт олэгыт, касынет мот-мот потыр потыртаве. Нёрт атым тынын ахвтасыт тот суссылтавет, ма-витув ос воруит, савсыр уит имтаныл тот олэгыт.

Ос акв самн маньщи нэ хотпан щалтункв щар ат кос рови. Тот сака яныг ялпын ощнэ маньщи ос ханты пес пормасыт акван-атым олэгыт. Сав тал ювле хультум порат ты пормасыт мань павлытт ос пурлахтын матт атвесыт.



Маньщи нэ маснут

Това колтаглыт танти Най-Отыраныл хурит, ялпын пормасаныл пуссын тув миманыл. Ам ты пормасыт сунсыгланкв ат патсанум, нас нэпаканыл послысанум. Тот Хорынпавыл, Лопмус ос мот мань павлын мат олум пормасыт олэгыт. Сав мот пес пормас, маснут тот ос суссылтаве.

Мот маныл ёхталан турист-махум ты музей-колн щалтсункв пўмыщ. Тот Хальўс район урыл сав пўмыщ потыр потыртаве. Хотьют касащи, ляпат ўнлын пупколн тотыглаве.

Ань ты йист музеит ман мот колыт пуссын ат рупитэгыт. Ос матыр сунсыгланкв танхегын те, ищхипын мат ты музей хонтэлын.



Сас тотапыт, сыспайп, совт

Валентина ВАСИЛЬЕВА

Луима сэрипос

(Северная заря) №13 (1223), 09.07.2020 Соучредители Дума, Правительство

Ханты-Мансийского автономного округа – Югры Издатель

Департамент общественных и внешних связей Ханты-Мансийского автономного округа – Югры

Редакция

Врио директора, гл.редактор - **Кондина Г.Р.** Телефон (3467) 33-22-72

Заместитель гл.редактора — **Кондина Г.Р.** Телефон (3467) 33-22-72

Ответственный секретарь – **Узель В.В.** Телефон (3467) 33-23-09

Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52

E-mail:gazeta@khanty-yasang.ru Газета размещена на сайте www.khanty-yasang.ru

Отпечатано:

ООО «Новости Югры-Производство» г. Сургут, ул. Маяковского, д. 14.

Индексы **04399**, **54399** Тираж **1710** экз. Заказ **2235**

Мнение авторов публикаций не обязательно отражает

Цена свободная

точку зрения редакции. Газета зарегистрирована Управлением Федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО.

Свидетельство о регистрации ПИ №ТУ 72-00795 от 23 января 2013 г.

Сав тал аквъёт олнэ нэг-хумыг янытлыягув

Ты этпос нёлолов хоталэт рущ щирыл лавнэ «День семьи, любви и верности» ялпын хотал олыс.

Ань ялпын хотал кастыл ам акв маньщи щёмья урыл потыртанкве танхёгум. Тыи Валерий ос Роза Меровыг, тэн щёмьян тагыл Саранпавылт олэг. Валера ос Роза ват саграпнал этпос нилахуйплов щислат 1989 талт акван-хасхатсыг.

Тэн кит пыг ос хурум аги янмалтасыг. Яныг пыген ос хурум агияген ань танки няврамыныг емтсыт. Ань нэг-хумыг апганэн янмалтанкве нётэг.

Мань пыген Ягрим павылт лицейт ханищтахты, лўпта этпост онтоловхуйплов талэ товлыс, наме ос Валера. Тэн ётэн Вика агитэн ос Ангелина, Дарья апгаген олэгыт.

Вова пыгён молтынув нэ тотыс, ань Светлана нэтэнтыл Илья пыгкетён янмалтэг. Ирина яныг агитэн Андрей пыг ос Яна аги оньщи, Алексей Семяшкин ойкатэ овлэт салы ўрнэ хотпаг яласас, тувыл Саранпавылт ДЮЦ «Поиск» нампа колт рўпитанкве патыс.

Юля котиль агитэн щемьятэ ёт Кульпасн вантлыс, ос кит няврам оньщи. Тав Максим Мурайченко ойкатэ та павылныл олы. Ты колтаглыт пуссын танки халанылт юрты ныщ олэгыт, акван-хонтхатыглэгыт, няврамыт щаняныл-ащаныл колн муйлункве ёхталэгыт.

Валерий – ам каңкум, ман ос яныг щемьят яныгмасув. Омав – Мария Сергеевна Мерова. Валера нёлолов класс астламе юипалт воссыг школат ат ханищтахтас. Та порат атяв атимыг емтыс,



тав ворт вораяс ос хул алыщлас. Тонт кит канкагув, Слава Ишим уст киномеханикыг ханищтахтас, Митя армият лусытас. Маньнув йигрищанув, апщиюв иншколат ханищтахтасыт.

Тувыл Валера армиян вуйвес ос Германият лусытас. Юв ёхтуме порат канкум Саранпавылт Тюменский авиабазат най харыгтан хотпаг ат тал рупитас. Тюмень уст десантникпожарный хотпаг ханищтахтас.

Етыл мот рупатан, плотникыг, патхатыглас. Юи-овыл рупатат ЖКХ котельный-колт операторыг рупитас, тувыл молты талт пенсиян минас. Ань Вова пыге тот рупиты.

Роза омаген-атяген Хорынпавылт янмалтавес, школат ханищтахтаме порат Саранпавылн тотыглавес ос интернатт олыс. Тав Ольга ос Нина увщияге школа астламен юипалт мот ман олункве минасыг. Ольга Няхщам-



вольт щёмьятэ олыс, Нина Ямалт хот олы.

Роза овлэт нявраманэ янмалтым юн ўнлыс. Павлыт рўпата торыныщ атим олыс. Тувыл тав школан кол ловтнэ нэг рўпитанкве воввес. Ань пенсиян ос патхатас кос, ос элаль рўпиты.

Валерий Сергеевич ос Роза Абрамовна ўщлахтын хоталыт манос отпускат олнэтэн сыс Хослохн ман Хорынпавылн няврамыт ёт ялантэгыт. Тот хул няслэгыт, пил ватэгыт.

Тэлы тан Лопмусн ёсал касункве ялэгыт. Валера яныг хум хотпат ёткасы, ос Валера пыгён маньлат хотпат халт касы, тованакт нохпатэг.

Ман ань ты Меров колтагыл ялпың хоталыл янытлылув, пуссын пустагыл вос олэгыт, Най-Отыранылн вос ургалавет!



Меровыт колтагыл

Тамара МЕРОВА